

MEMORANDUM

O RAZUMIJEVANJU O PRAVNOJ POMOĆI I SLUŽBENOJ SARADNJI U OBLASTI IZVRŠENJA MJERA SIGURNOSTI OBAVEZNOG PSIHIJATRIJSKOG LIJEČENJA IZREČENIH U KRIVIČNOM POSTUPKU IZMEĐU BOSNE I HERCEGOVINE, FEDERACIJE BOSNE I HERCEGOVINE, REPUBLIKE SRPSKE I BRČKO DISTRIKTA BOSNE I HERCEGOVINE

("Sl. glasnik BiH", br. 44/2006)

Imajući u vidu:

Odluku Evropskog suda za ljudska prava broj 11123/04 od 11.10. 2005. godine u predmetu Fikret Haxić protiv Bosne i Hercegovine prema kojoj Fikret Haxić mora izvršavati mjeru sigurnosti obaveznog psihijatrijskog liječenja u odgovarajućoj ustanovi za izvršavanje takve mjere;

Preporuku Pravobranilaštva Bosne i Hercegovine da sva lica kojima je izrečena mjera sigurnosti obaveznog psihijatrijskog liječenja moraju tu mjeru izvršavati u odgovarajućoj ustanovi;

Da u Bosni i Hercegovini postoji samo jedna ustanova za izvršavanje mjere sigurnosti obaveznog psihijatrijskog liječenja i to u Psihijatrijskoj bolnici "Podromanija" u Sokocu;

Zaključke Savjeta ministara Bosne i Hercegovine sa 106. sjednice održane 02.02.2006. godine i 111. sjednice održane 02.03.2006. godine koja se odnosi na izvršenje Odluke za ljudska prava broj 11123/04 od 11.10.2005. godine u predmetu Fikret Haxić protiv Bosne i Hercegovine;

Da je članom 251. Krivičnog zakona Bosne i Hercegovine ("Službeni glasnik BiH", broj 3/03) predviđeno da će Ministarstvo pravde Bosne i Hercegovine i nadležna ministarstva entiteta, odnosno nadležni organ Brčko Distrikta Bosne i Hercegovine postići sporazum u pogledu izvršenja krivično pravnih sankcija u institucijama i nadležnostima entiteta odnosno Brčko Distrikta Bosne i Hercegovine u roku od tri mjeseca od stupanja na snagu ovog Zakona;

Da čl. 21. i 22. Zakona o krivičnom postupku Bosne i Hercegovine ("Službeni glasnik BiH", broj 3/03) predviđa pravnu pomoć i službenu saradnju između sudova i organa vlasti u cijeloj Bosni i Hercegovini;

Da se kazne zatvora i druge mjere izrečene od strane sudova u Bosni i Hercegovini izvršavaju u ustanovama koje za tu namjenu odredi ministar nadležnog ministarstva u saradnji sa nadležnim organima Federacije Bosne i Hercegovine, Republike Srpske i Brčko Distrikta Bosne i Hercegovine;

Da Zakon o pravnoj pomoći i službenoj saradnji između Bosne i Hercegovine, Federacije Bosne i Hercegovine, Republike Srpske i Brčko Distrikta Bosne i Hercegovine ("Službeni glasnik BiH", broj 13/02, "Službene novine Federacije BiH", broj 25/02, "Službeni list Republike Srpske", broj 34/02 i "Službene novine Brčko Distrikta BiH", broj 6/02) predviđa pravnu pomoć i službenu saradnju u krivičnim stvarima.

Zaključujemo Memorandum o razumijevanju

1. Ovaj Memorandum o razumijevanju (u daljnjem tekstu: Memorandum) reguliše pravnu pomoć i službenu saradnju između Bosne i Hercegovine, Federacije Bosne i Hercegovine, Republike Srpske i Brčko Distrikta Bosne i Hercegovine u vezi sa svim naredbama o izvršavanju mjera sigurnosti koje garantuju prisustvo osumnjičenoga ili optuženog kao što su dovođenje ili prijevoz osumnjičenoga ili optuženog, kao i o svim odlukama sudova ili tužilaštava kako je to predviđeno krivičnim zakonima, zakonima o krivičnom postupku i izvršavanjima mjera sigurnosti Bosne i Hercegovine, Federacije Bosne i Hercegovine, Republike Srpske i Brčko Distrikta Bosne i Hercegovine.
2. Svaka od stranaka će omogućiti najviši nivo saradnje u provedbi pravne pomoći i službene saradnje u izvršavanju mjera sigurnosti obaveznog psihijatrijskog liječenja.
3. Ako bilo koji sud u Bosni i Hercegovini naredi hapšenje i pritvaranje i/ili prijevoz pritvorenog ili osuđenog lica iz čitave Bosne i Hercegovine nadležni organ vlasti svih stranaka je obavezan izvršiti ovaj zahtjev. Dodatna naredba ili zahtjev bilo koje stranke nije potreban.
4. Sve izrečene mjere sigurnosti obaveznog psihijatrijskog liječenja od strane bilo kojeg suda u Bosni Hercegovini će se izvršavati u Psihijatrijskoj bolnici "Podromanija" u Sokocu.
5. Izvršenje mjere sigurnosti obaveznog psihijatrijskog liječenja će se izvršavati u skladu sa Pravilnikom o kućnom redu u mjestu izvršenja.
6. O uslovnom otpustu lica odlučuje nadležna komisija.
7. O odlaganju mjere sigurnosti obaveznog psihijatrijskog liječenja i prekidu izvršenja odlučuje nadležni sud.
8. U vezi sa snošenjem troškova koji nastanu pri izvršavanju mjere sigurnosti obaveznog psihijatrijskog liječenja prema ovom Memorandumu primjenjivaće se sljedeće:
 - a) troškovi izvršavanja mjere sigurnosti obaveznog psihijatrijskog liječenja će se regulisati posebnim sporazumom između Ministarstva pravde Bosne i Hercegovine, Federalnog ministarstva pravde, Ministarstva pravde Republike Srpske i Pravosudne komisije Brčko Distrikta Bosne i Hercegovine;
 - b) dnevni troškovi izvršavanja mjere sigurnosti obaveznog psihijatrijskog liječenja će iznositi 34,00 KM (tridesetčetiri konvertibilne marke) po licu.
9. Ovaj Memorandum će se objaviti u službenim glasilima Bosne i Hercegovine, Federacije Bosne i Hercegovine, Republike Srpske i Brčko Distrikta Bosne i Hercegovine.
10. Memorandum stupa na snagu danom potpisivanja.